

Utoqqarnut immikkut siunnersuisarfimik pilersitsinissamik pisariaqartitsineq periarfissarlu pillugit kingusinnerpaamik 2017-imi kommuninik oqaloqatiginninnissamik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut. Kommuninik oqaloqatigiinnerit inernerit iliuuserisassatullu eqqarsaatigisat utoqqaallu siunnersorneqarnerisa patajaallisarneqarnissaanut aningaasaliinissamut periarfissat kingusinnerpaamik UPA 2018-mi allakkatigut Inatsisartunut nalunaarusiarineqassapput.

pillugu

Ilaqutariinnermut Peqqissutsimullu Ataatsimiititaliap

Siunnersuutip aappassaaneernejarnerani

ISUMALIUTISSIISSUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Martha Lund Olsen, Siumut, siulittaasoq
Inatsisartunut ilaasortaq Mala Høy Kuko, Atassut, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Laura Tàunâjik, Siumut
Inatsisartunut ilaasortaq Debora Kleist, Inuit Ataqtigiit
Inatsisartunut ilaasortaq Mimi Karlsen, Inuit Ataqtigiit
Inatsisartunut ilaasortaq Kelly Berthelsen, Inuit Ataqtigiit

UPA 2017-imi ulloq 2. maj 2017-imi siullermeerinerup kingorna siunnersuut ataatsimiititaliamit sukumiisumik misissorneqarpoq.

Siunnersuutip imarisaa siunertaalu

Utoqqarnut siunnersuisarfimmik pilersitsinissamut tamatumunngalu aningaasalersuinissamut periarfissaqarnerisat kommunit oqaloqatigineqarnissaannik Naalakkersuisut peqquneqarnissaannik siunnersuut una aalajangiiffigisassatut siunnersuutaavoq. Utoqqaat peqqinnissakkut, nerisaqarnerinut timersornerinullu, pensionisiat tungaasigut, ineqarnerinut tunngasunut, suliffeqarfinnut attuumassuteqarnerinut qarasaasianillu atuinissamut periarfissanik il.il. siunnersuisoqarnissaannik amigaateqartoqarnera ikiorsiivigiumallugu siunnersuummi siunertarineqarpoq.

Kommunik oqaloqateqarnerup malitseqartitsilluni inerniliinerit pillugit Naalackersuisut kingusinnerpaamik UPA 2018-imi Inatsisartunut allakkatigut nalunaarusiamik nassiussaqtussaapput.

Siunnersuutip Inatsisartuni siullermeerneqarnera

Siullermeerinermi Naalackersuisut, Siumup, Inuit Ataqatigiit, Demokraatit aamma Partii Naleqqap siunnersuummut tamarmik tapersersuillutik oqaatigaat.

Siunnersuut sukumiinerusumik naliliivigineqarnissaa siunertaralugu sukumiinerusumik naliliivigineqartussanngorlugu Ilaqutariinnermut Peqqissutsimullu Ataatsimiititaliamut innersuunneqarpoq.

Siunnersuummik ataatsimiititaliap suliarinninnera

Utoqqaat oqaaseqartartuannik pisariaqartitsisoqarnera siullermeerinermi aamma eqqaaneqartoq Ilaqutariinnermut Peqqissutsimut ataatsimiititaliamit maluginiarneqarpoq. Apeqput pineqartoq siunnersuummi matumani pineqanngimmat tamatumunnga atatillugu pisariaqartitsinermut tassunga ataatsimiititaliaq annertunerusumik iliuuseqassanngilaq.

Kommunit nammineersinnaanerat kommunillu utoqqarnik sullissinissamut aaqquussinissamut periarfissaqarnerat iluarisimaaraluarlugu, nuna tamakkerlugu utoqqarnik siunnersuinerup sullissinerullu ataatsimut isigalugu nukittorsarneqarnissaanik pisariaqartitsisoqarnera takuneqarsinnaasoq ataatsimiititaliamit isumaqarfigineqarpoq.

Innuttaasut katitigaanerisa ineriartornera utoqqaat amerliartornerannik kinguneqarpoq.

Inuiaqatigiit atugarissaarfiusut ataatsimut isigalugu nukittorsarlugillu ineriartortinneqarnissaat naalackersuinikkut suliaqarnermi ataatsimiititaliamit sammeneqarpoq.

Utoqqaat utoqqalinersiallillu atugaat akuttunngitsumik Inatsisartuni naalackersuinikkut oqallisigineqartarlutillu suliarineqartarput. utoqqaat sapinngisamik sivilunerpaamik suliffeqaannarnissaasa qulakkeerneqarnissaa soqutigineqarpoq, taamaaliornikkut utoqqaat misilittagarpasui piginnaasaallu ataasiakkaanut ataatsimullu isigalugu inuiaqatigiinnut sapinngisamik annertunerpaamik atorneqarsinnaaqullugit. Utoqqartatta angerlarsimaffigisaminni sapinngisamik sivilunerpaamik najugaqartarnissaat kisaatigaarput, tamatumunngali atatillugu isumassuinissamik, utoqqarnut najugassiani najugaqarnissaannik, paarineqarnissaannik, peqqinnissakkut ataasiakkaallu pisariaqartitaannut utoqqarnut tulluarsakkamik tapersersuinissamik neqeroorfigisinnaassariaqarpavut. Utoqqaat pisariaqartitaat atugaallu assigiinngitsorujussuupput, atugarissaarnissamillu aaqquussinerput atugarissaarnissamullu tunniuttakkavut pisariaqartitsinerup naapertuuttunngorsarniartuarpavut. Qarasaasiatigut atortorissaarutitigut qarasaasiat

aqqutigalugit attaveqartarnerit aaqqiiniartarnerillu siuariartorfigiuarparvut, kisianni peroriartornermi qarasaasiat nutaaliat atugarisimannigikkaanni immikkut eqqumaniarfigineqarnissaa pisariaqarsinnaavoq.

Soraarninngorneq utoqqarpassuarnut inuunermik nutaamik aallartitsiffiusarpoq immikkut isumaliuteqarfiusinnaallunilu eqqarsaatersuuteqarfiusinnaasoq. Suliffeqarfinnut attuumassuteqarnerup aalajangiusimaannarnissaanut suut periarfissaappat, soraarnerussutisianut tunngasut qanoq isikkoqarpat, peqqinnissakkut pitsaanerpaamik sullinneqarnissaq qanoq qulakkeerneqarsinnaava aamma ineqarnermut angerlarsimaffimmilu ikiorteqarnissamut taperneqarnissamut periarfissat suuppat? Aperquterpassuusinnaapput, siunnersorneqarnissamik atukkatigullu sullinneqarnissamik aammalu utoqqaat imikkut eqqumaffigineqarnerusariaqaraluarnerat pisariaqaleraluttuinnartoq ataatsimiititaliamit nassuerutigineqarpoq, taamaattumillu tamanna pillugu Naalakkersuisut kommuninik kinguneqarluartumik oqaloqatigiinnermik aallartitsiniarnerat ataatsimiititaliap tapersorsorpa.

Soraarninngornerup saniatigut utoqqaliartorneq inuttullu unammilligassaqaalersitsisarpoq. Immikkut siunnersorneqarnissaq peqqissutsimillu ilisimasaqarnissaq, nerisatigut, sungiusaqqittarnermut aamma utoqqarnullu tulluussakkamik timigissartarnissaq pisariaqarsinnaapput, taamaattumik siunnersuisarfik assigiinngitsorpassuarnut iluaqutaasinnaavoq pisariaqartinneqartorpassuarnullu naammassinnissinnaalluni.

Siunnersuummik suliaqarnerup ingerlateqqinneqarneranut atatillugu utoqqaat peqatigiiffii atuuttut taamatuttaaq oqaloqatigineqarnissaat kaammattuutigineqassasoq ataatsimiititaliaq isumaqarpoq, taamaaliornikkut utoqqaat siunnersorneqarnissamut atukkatigullu sullinneqarnissamut pisariaqartitaat ilisimasaqarfiginissaat paasisaqarfiginissaallu qulakkeerneqarsinnaaqqullugu. Siunnersuut utoqqarnut sammitinneqarpoq taamaattumik suliap ingerlanneqarnerani peqataatinneqarnissaat pingaaruteqarpoq.

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimasoqarpoq aalajangiiffigisassatut siunnersuutip piviusunnigortinneqarnissaani aningaasatigut allaffissornikkullu kingunerisassat siunnersuummi tunngavilersuutitut allaaserineqassasut.

Siunnersuummut tunngatillugu suliap ingerlateqqinneqarnerani aningaasatigut kingunerisassat AC fuldmægtigimut ukiumut akissarsiaritinneqartartut ¼-iusoq allassimavoq, tamanna ataatsimiititaliamit tusaatissatut tiguneqarpoq.

Nalunaarusiaq naammassisaq matumani ilanngullugit suliniutit ingerlateqqinneqarnissaannut tunngatillugu pisariaqartitat tunngavigalugit aningaasalersueriaatsit tigusaqarfiginissaat ataatsimiititaliamit qilanaarineqarpoq. Kommuninik oqaloqateqarnerup nangingneqarnerani

kommunit ataasiakkaat utoqqarnik sullissinerat qanoq aaqqissuunneqarsinnaanersoq sullissisoqarsinnaanersorlu pillugit qulaajaanertut allaaserinninnertullu ilanngullugu isumaqarfigineqarpoq.

Ataatsimiititaliap inassuteqaataa

Siunnersuut ilusimisut iluseqartoq Inatsisartunit akuerineqassasoq ataatsimiititaliap **Isumaqatigiittup** inassutigaa.

Taama naatsumik oqaaseqarluni isumaliutissiisummilu oqaatigineqartutut paasinnilluni siunnersuut Ilaqutariinnermut Peqqissutsimullu ataatsimiititaliap aappassaaniigassanngortippaa.

Martha Lund Olsen,
Siulittaasoq

Mala Høy Kuko,
Siulittaasup tullia

Laura Tàunâjik

Mimi Karlsen

Jess Svane

Debora Kleist

Kelly Berthelsen